

Morning Dogri (NSD) Bulletin 16-10-2024

आकाशवाणी

- नेशनल कांफ्रेंस दे नेता उमर अब्दुल्ला होर अज्ज जम्मू-कश्मीर दे मुखमंत्रि दे रूपे च संगंध चुक्कडन।
- विदेश मंत्री डॉ. एस. जयशंकर होर अज्ज इस्लामाबाद च शंघाई सहयोग संगठन सम्मेलन च हिस्सा लैडन।
- राष्ट्रपति द्रौपदी मुर्मू होर मारिढानिया दे राष्ट्रपति मोहम्मद कुल्ड गजौआनी हुंदे कन्नै दपक्खिय गल्लबात करडन।
- मणिपुर विधानसभा दे चुने गेदे सदस्ये दी नमीं दिल्ली च बैठक दौरान राज्य च शांति लेई कम्म करने दा धेइया पक्का कीता गोआ।
- मौसम विभाग नै अगले दऊं दिनें दौरान दक्खनी प्रायद्वीपीय ते पश्चिमी क्षेत्रे च मती भारी बरखा बरने दा पूर्वानुमान लाया ऐ।
- अज्ज बंगलुरु च त्रऊं मैचे दी टेस्ट सीरीज़ दे पैहले मैच च भारत दा मुकाबला न्यूजीलैंड कन्नै होग।
- आई.सी.सी महिला टी-20 विश्व कप च वेस्ट इंडीज़ नै इंग्लैंड गी 6 विकेटे कन्नै हराइयै सेमीफाइनल च अपनी थाहर पक्की कीती।

<><><><><><>

J&K Swearing

नेशनल कांफ्रेंस दे नेता उमर अब्दुल्ला होर अज्ज केंद्र शासित प्रदेश जम्मू-कश्मीर दे मुखमंत्री दे औहदे दी सगंध चुक्कडन। उपराज्यपाल मनोज सिन्हा होर उनेंगी औहदे ते राजदारी दी सगंध दोआंगन। शपथ ग्रहण समारोह बड्डलै साड्डे 11 बजे श्रीनगर दे शेर-ए-कश्मीर अंतरराष्ट्रीय कन्वेंशन सेंटर च लग्गोग जेदे च उमर अब्दुल्ला हुंदे अलावा उंदे मंत्री परिषद दे मिम्बरें गी बी सगंध चकाई जाग। हाल च गै सम्पन्न होए दे जम्मू-कश्मीर विधानसभा चुनाएं, जेहडे जे 10 बरें दे वक्ते मगरा कराए गए न, उंदे च नेशनल कांफ्रेंस 42 सीटां हासिल करिये सब्बनें शा बड्डी पार्टी दे तौर पर उभरिये सामने आई ही। स्हाडे श्रीनगर आहले संवाददाता नै जानकारी दिती ऐ जे चुनां कोला पैहले नेशनल कांफ्रेंस कन्ने जुडी दी कांग्रेस जिन्ने छडी 6 सीटें पर जित हासिल कीती ऐ, दे अलावा इक-इक सीट जितने आहली सीपीआई (एम) ते आम आदमी पार्टी दे अलावा किश आजाद मेदवारें बी उमर अब्दुल्ला हुंदी पार्टी गी समर्थन दिता ऐ। कांग्रेस पार्टी दे राष्ट्रीय अध्यक्ष मल्लिकार्जुन खडगे, लोकसभा च विपक्ष दे नेता राहुल गांधी, प्रियंका गांधी वाडरा, के.सी वेणुगोपाल, समाजवादी पार्टी दे अखिलेश यादव ते आई.एन.डी.आई गठबंधन दे होर केई मिम्बर नेताएं दे अज्जै दे शपथ ग्रहण समारोह च शिरकत करने दी मेद ऐ।

<><><><><><><><>

BJP-CEC

भारतीय जनता पार्टी दी केंद्रीय चुनां समिति दी कल संझा नमीं दिल्ली च इक बैठक होई। इस बैठक च झारखंड च आँदे विधानसभा चुनां आस्तै मेदवारें दे नां गी अखीरी रूप देने पर चर्चा कीती गई। भाजपा मुख्यालय च आयोजित इस बैठक च पार्टी दे वरिष्ठ नेता ते प्रधानमंत्री नरेंद्र मोदी, गृह मंत्री अमित शाह, पार्टी अध्यक्ष जे.पी नड्डा सने कई वरिष्ठ नेता मौजूद हे।

<><><><><><>

Jaishankar-SCO

विदेश मंत्री डॉ. एस जयशंकर होर इस्लामाबाद च अज्ज शंघाई सहयोग संगठन एस.सी.ओ दे शासनाध्यक्षें दी परिषद दी 23मीं बैठक च हिस्सा लैडन। ओह गोआंडी मुख्य पाकिस्तान दे दो दिन दे दौरें पर कल पाकिस्तान पुज्जे हे। पाकिस्तान दी अध्यक्षता च होआरदी एससीओ दी इस बैठक च डॉ. जयशंकर भारत दी अगुवाई करडन। भारत एससीओ दी हर गतिविधि च सक्रियता कन्नै हिस्सा लैदा ऐ। संगठन दी हर बरे शासनाध्यक्षें दी बैठक आयोजित कीती जंदी ऐ जेदे च ब्यार ते आर्थिक एजेंडे पर विचार-विमर्श कीता जंदा ऐ। जयशंकर होरें आखेआ हा जे उंदी यात्रा इक बहुपखी मकसद आस्तै ऐ। उनें इस मौके पर कुसै बी चाल्ली दी दपकखी गल्लबात होने दी संभावना थ्वां इंकार कीता।

पिछले 9 बरें च कुसै भारतीय विदेश मंत्री दी गोआंडी मुख्य दी एह पैहली उच्च स्तरीय यात्रा ऐ।

<><><><><><><><>

President-Visit

राश्ट्रपति द्रौपदी मुर्मू होर अल्जीरिया दी 3 दिन दी यात्रा सम्पन्न करने परेंत अपने दौरै दे दुए चरण च अज्ज मारिटानिया लेई रवाना होडन। राश्ट्रपति मुर्मू होरें भारत ते अल्जीरिया बश्कार सरबंधें गी मजबूत करने दे उद्देश्य कन्नै उच्ची सतह दे नेताएं ते शिष्टमंडल कन्नै बक्ख-बक्ख दपक्खिय बैठकां कीतिआं। संवाददाता नै जानकारी दिती ऐ जे मारिटानिया दी इक ध्याड़े दी यात्रा च राश्ट्रपति होर कई कार्यक्रमें च शामिल होंगन। ओह मारिटानिया दे मोहम्मद आउल्द गजौआनी ते होरनें नेताएं कन्नै दपक्खिय बैठकां करंगन। राश्ट्रपति मुर्मू होर मारिटानिया च भारतीय समुदाय कन्नै बी गल्लबात करंगन। विदेश मंत्रालय नै दस्सेया ऐ जे राश्ट्रपति मुर्मू हुंदी अल्जीरिया यात्रा ऐतिहासिक रेही ऐ। विदेश मंत्रालय दे सचिव अरुण कुमार चटर्जी होरें दस्सेया जे इस दौरै कन्नै दौनें देशें बश्कार राजनीतिक, आर्थिक ते सांस्कृतिक सरबंधें गी बढ़ावा थहोग। राश्ट्रपति होरे त्रुं मुखें, अल्जीरिया, मारिटानिया दे मलावी दी यात्रा पर न। अपनी यात्रा दे त्रीए चरण च राश्ट्रपति होर कल मलावी पुज्जंगन। इस देसै दी यात्रा दा उद्देश्य अफ्रीकी मुखें कन्नै भारत दे सरबंधें गी सशक्त करना ते विस्ता देना ऐ।

<><><><><><><><>

FM-Visit

केंद्री वित्त मंत्री निर्मला सीतारमण होर अज्ज 2 मुल्खें मैक्सिको ते अमरीका दे दौरे पर रवाना होंगन। इस म्हीने दी 17 थ्वां 20 तरीक तगर मैक्सिको दी अपनी यात्रा दे पैहले चरण च श्रीमति सीतारमण मैक्सिको दी सिलिकॉन वैली च टेक लीडर्स राउंड टेबल सम्मेलन दी अध्यक्षता करंगन। सीतारमण होर मैक्सिको दे वित्त ते सार्वजनिक दौहार मंत्री रोजेलियो रामिरेज डे ला ओ हुंदे कन्नै दपकखी बैठक करंगन। ओह संसदीय सहयोग गी मजबूत करने ते आर्थिक विकास गी बढ़ावा देने आस्तै उत्थुआं दे संसद सदस्यें कन्नै बी चर्चा करडन। मैक्सिको सिटी च श्रीमति सीतारमण भारत-मैक्सिको बपार ते निवेश शिखर सम्मेलन च मुख्क भाषण देंगन। अपने दौरे दे दुए गेड़ च सीतारमण होर अमरीका दे दौरे पर रौडन।

<><><><><><><><>

Home-Minister Manipur

मणिपुर विधानसभा दे चुने गेदे सदस्यें दे इक समूह नै जेहदा Kuki zo Hmar मैती ते नागा समुदायें दा प्रतिनिधिमंडल करा'रदा ऐ। कल नमीं दिल्ली च राज्य च मौजूदा स्थिति गी लेइयै चर्चा करने लेई बैठक कीती। केंद्री गृह मंत्रालय नै इक बयानै च आखेआ ऐ जे बैठक च एह आखेआ गेआ ऐ जे दौनें समुदायें दे लोकें गी अपील कीती जाग जे ओह हिंसा दा रस्ता छोड़ी देन तां जे बेकसूर लोकें दी जान नेई जा।

<><><><><><><><>

JPC-WAQF

संसद दी संयुक्त समिति जेपीसी दी कल नमीं दिल्ली च इक बैठक होई जेदे च वक् संशोधन विधेयक 2024 पर चर्चा कीती गई। लोकसभा सदस्य जगदंबिका पाल दी अध्यक्षता च आयोजित इस बैठक च विधेयक दे सरबंध च अल्पसंख्यक मामले दे मंत्रालय दे प्रतिनिधियें शा मौखिक साक्ष्य लैता गेआ। इस विधेयक दा उद्देश्य वक् बोर्ड दी कार्य प्रणालियें दी कमियें गी दूर करना ते वक् संपत्तियें दे प्रशसन ते प्रबंधन दी दक्षता च बढ़ावा करना ऐ। संयुक्त संसदीय समिति इस विधेयक दी जांच करने मगरा संसद दे स्याले आले इजलास दौरान अपनी रिपोर्ट पेश करोग।

<><><><><><>

Weather

मौसम विभाग नै अगले 2 दिनें दौरान मुख्य दे दक्खणी हिस्सें ते पच्छमी क्षेत्र च तेज बरखा होने दी पेशनगोई कीती ऐ। मौसम विभाग नै अज्ज तमिलनाडू पुडुचेरी ते कराईकल ते कल रायल सीमा, तटीय आंध्र प्रदेश ते यानम च बी तेज बरखा पौने दी पेशनगोई कीती ऐ। विभाग दा आखना ऐ जे कल तगर कोंकण ते गोवा च बी तेज बरखा होने दी मेद ऐ।

<><><><><><>

India-Newzealand Test Cricket

क्रिकेट च त्रुं मैचें दी श्रृंखला आहली टेस्ट सीरीज दा पैहला मैच अज्ज बेंगलोर दे एम. चिन्नास्वामी स्टेडियम च भारत ते न्यूजीलैंड बश्कार खेडेआ जाग।

मैच बड्डलै साड्डे 9 बजे शुरू होई जाग। भारतीय टीम इसलै आई.सी.सी वर्ल्ड टेस्ट चैंपियनशिप दी अंकतालिका च शीर्ष पर ऐ ते इस श्रृंखला च जित कन्नै लगातार त्री बारी ँ।इनल च अपनी थाहर पक्की करने दी मेद होर निग्गर होई जाग।

<><><><><><>

Women T-20

आई.सी.सी टी-20 विश्वकप क्रिकेट च वेस्ट इंडीज़ नै कल रातीं दुबई च इंग्लैंड गी 6 विकटें कन्नै हराइयै सेमी।इनल च अपनी थाहर पक्की करी लेती ऐ। ग्रुप-बी च खेड्डे गेदे मैच च पैहले बल्लेबाजी करदे होई वेस्ट इंडीज़ दी टीम नै इंग्लैंड दी टीम गी तय 20 ओवरें च 7 विकटें दे नुकसान पर 141 रन गै बनान दित्ते। एहदे परते च वेस्ट इंडीज दी टीम नै 12 गेंदां बाकी रौहंदे होई लक्ष्य हासल करी लैता।

<><><><><><>